

CHALANDAMARZ A S-CHANF

Ad es ils 1. favrer. Tuot ils mats s'allegran cha paun darcho schlupper lur geischlas. Be aunch'ün mais e Chalandamarz es darcho cô! Minchün cumainza a s'allegrer sül Chalandamarz, impustüt cur cha'ls mats cumainzan a schlupper la geischla. Minchün so alura cha nu vo pü lönch fin cha'd es darcho uschè inavaunt. A nus patruns fo uossa già trist be l'impissamaint cha quist es nos ultim Chalandamarz cha pudains piglier part. Quista festa ho da pitschen sü üna grand'importanza per nus tuots. Già cur cha nu savaivans auncha propi chaminer traivans aint la blusa blova cun 1-2 rösas, üna bronzina intuorn il culöz e pruvaivans da chaminer culs grands. Nus ans algurdains gugent da noss ans da Chalandamarz, e forsa es eir que quello cha'ns fo gnir uschè üna buna gruppa.

Nus patruns e patrinas, chavagls e chavallas essans già ferm occupos cullas planisaziuns per Chalandamarz. Nus vains gieu ils 30/01/2018 nossa prüma tschanteda a S-chanf cun Duonna Brigitte, Duonna Madlaina e Sar Arno Parli. Arno es il fundatur e president da la nouva societad „Amihs da Chalandamarz“ cha que do daspö quist an.

Il trenamaint da sot cun Esther Del Negro ho eir già cumanzo e nus tuots ans allegrains sün nossa tradiziun annuela. Il sot es adüna fich divertent perche cha's impreda bgers novs pass e dafatta novs sots!

Hoz es la prüma prouva da Chalandamarz. Nus essans üna mezz'ura memma bod tar la scoula primara a S-chanf. Ils iffaunts d'eiran fich agitos ma a nun haun fat fich tuct. A d'eira ün cool sentimaint dad esser ils schefs da tuots. Nossa truppa d'eira fich buna e nus tuots vains gieu ün fich bun temp da preparaziun. Nus vains adüna pudieu rir insembel e nu vains me gieu da reclamer qualchosa. Minchün ho fat sia lezcha. Mincha prouva da chaunt u trenamaint da sot d'eira allegraivel cun nossa truppa e pudaivans adüna rir insembel. Quist an d'eira la cumpagnia uschè buna e que vainsa craj eir pudieu musser a tuots.

Ad es ils 28 favrer. Il prüm di da Chalandamarz! Hoz giains giò Chapella. Il cortegi cumainza a las nouv. Ad es ün fraid püerch! Nus stuvains chaminer aint illa sumbriva. Finelmaing las 10.00. que vuol dir Posa! Tuots haun fraid. Per furtüna do que tè chod. Duonna Luzia ho fat patlauns. Zieva la posa vo que inavaunt. Na pü lönch ed alura es posa da mezdi. „Finelmaing“ dischan ils pitschens. Tuots sun cuntaints cha paun ir a chesa a chod. Zievamezdi vo que inavaunt a Cinuos-chel. Quels da S-chanf e Chapella paun gnir giò Cinuos-chel cun las charrozzas. Uossa nun es pü uschè fraid



scu a bunura. Cur ch'essans tar la Veduta survgnins darcho üna buna marena. Zieva pudains darcho ir sü cullas charrozzas. Il prüm di es già passo.

Zieva'l cortegi nun es auncha a fin per nus patruns. Nus stuvains ir a fer pront la sela da gimnastica pel ballin. Nus vains auch'agüd da duos creschieus da la societad «Amihs da Chalandamarz». Nus nu vains druvo lösch per fer pront tuot pel ballin e per la tschaina da la magistraglia e'l cussagl da scoula. Zieva cha vains fat pront tuot giains a manger pizza al Walther a Zuoz. Seguaint a la tschaina giains darcho a S-chanf. Las 24.00 giains a schlupper la geischla. Uossa es 1.00 e tuots sun staungels. Per furtüna pudains uoss'ir a durmir ch'essans fit per damaun.

Hoz es Chalandamarz a S-chanf. Nus da Cinuos-chel e Chapella giains sü S-chanf cun ün bus. Rivos a S-chanf as radunan tuot ils patruns per discuter il di. A las 7.00 cumanzainsa cullas prümas chanzuns tar la chesa da scoula. Tuot ils patruns sun staungels da la not passada ma s'allegran sün hoz. Zieva ün pêr chanzuns cumainza la gruppa ad ir inavaunt tar las prosmas chesas. Scu prüm vers la staziun e tuot las



chesas vers Zuoz. Las 9.15 finelmaing posa pensan tuots. Uossa vo que in chesa da scoula a manger e baiver qualchosa chod. Las 9.45 vo que inavaunt plain energia e plaschair tar las prosmas chesas. Cur cha tuot la cumpagnia vezza cha que vo sü vers la chesa da la famiglia Bernasconi sun tuots cuntaints perche cha que es l'ultima chesa aunz mezdi. Cur cha nus essans a fin cun chanter l'ultima chanzun ho ün patrun auncha dit als iffaunts pü pitschens ch'els as dessan piglier insembel perche cha que es nos ultim Chalandamarz e cha nus vulains auncha giodair quel. Lura paun tuots ir a chesa a manger gianter. Quels da Cinuos-chel e Chapella vaun pelpü a manger tar cumpagns da S-chanf. A las 13.00 ans vainsa tuots darcho chattos tar la scoula per ir inavaunt ill'otra direcziun da S-chanf. Tuot la cumpagnia vo inavaunt e chaunta tar mincha chesa üna fin duos chanzuns. Tar ün pêr

chesas pudainsa dafatta ir aint a chanter scu tar Salzgeber. Lo faun ils mats cullas plumpas scu prüm ün pêr rundas ill'ufficina e lura chantains aunch'ün pêr chanzuns. Impustüt l'ultim töch aunz la chesa da scoula as tira adüna in lungia ed a nun es pü uschè flot perche cha tuots sun staungels e nun haun pü uschè granda vöglija. Scu finischiun chantains auncha ün pêr chanzuns tar la chesa da scoula e lura es que finelmaing a fin. Uossa cuorran tuots cuntaint sü da las s-chelas vers il restorant La Staila perche cha lo do que uossa üna buna marena per tuots. Zieva vaun auncha tuot ils patruns our per fer üna fotografia. Zieva que paun tuots ir a chesa. Be las

patrunas stöglan aunch'ir in scoula per preparar las chastagnas per il ballin chi`d es il prossem di.

Hoz es il ballin da las 14.00 fin las 17.00. Ils patruns as radunan in gardaroba per as preparar pel ballin. Uossa cumainza il ballin e tuots vaun sül palc per suter. Intuorn las 15.00 es il teater da la scoulina. Zieva que vo que inavaunt cul ballin. Las 17.00 es il bal dal zievamezdi a fin e tuots vaun a chesa. Be ils patruns restan in scoula per preparar la tschaina per ils magisters e las otras persunas importantas. Ün pêr patruns stöglan güder a servir, ün pêr a preparar ils plats ed ün pêr illa cuschina. In quel temp vains nus eir auncha svelt temp d'ans müder illa gardaroba pel bal a la saira. Cuort aunz las 20.00 per finir la tschaina disch il prüm patrùn auncha qualchosa. Uossa es las 20.00 e tuot ils oters iffaunts vegnan darcho ed il bal po ir inavaunt. Per avrir il bal fainsa nus patruns il «Lawinentanz». Nus fains differents gös cun suter uschè cha que nu vegn lungurus. As ho eir la pussibilitèdad dad ir a manger u baiver qualchosa. Mezzanot il bal es a fin, tuots vaun a chesa e nus patruns vains uossa not libra. Nus giains tuots insembel tar ün colleg a festager nos ultim Chalandamarz. Al prossem di staun tuot ils patruns aunch'ir a rumir sü la sela.



Nus tuots chattains cha que d`eira ün fich fich bel Chalandamarz e nus tuots vains giodieu il temp cun tuots insembel.